

ADISKIDETZE SAKRAMENTUAREN ELKARTEKO OSPAKIZUNA

Kantua: Zatoz, Jauna! (Gora Jainkoa 2, 4. orrialdea).

Agurra

Gure bidera ateratzen Maitasunaren Aita Jainkoa izan bedi zuekin.

Sarrerako oharpena

Abendualdi osoa da Eguberrialdirako prestaera luze bat, badatorren Jauna onartzeko prestaera. Jaunari bidea prestatzeko eta Jainkoaren hitza entzuteko deia dugu Abendualdia.

Ospakizun honetan era sendoagoan otoitz egin nahi dugu; ospakizun hau gure erromesaldi itxaropentsuan aurrerapausoa gerta daiteke, etorri zen, badatorren eta etorriko den Jainkoaren topo egiteko prestaera ederra gerta dakigula.

Otoitza

**Jainko Jauna,
egizu, erne egon gaitezela
zure Seme Jesukristoren etorrera itxaroten;
ate joka datorrenean,
otoitzean aurki gaitzan,
Bera goresten pozez kantari.
Zurekin eta Espiritu Santuarekin batean
Jainko eta Errege bizi baita gizaldi eta gizaldietan.**

Lehenengo irakurgaia

Isaias 40, 1-5, 9-11 [B urteko Abendualdiko II. Igandekoa]

Erantzun Salmoa

Is 12, 2. 3 eta 4bcd. 5-6 [Liburuxka honetan, 35. orrialdean]

Ebanjelioa

Mateo 4, 12-17 [*Del III. Domingo del Tiempo Ordinario, Ciclo A, abreviado*]

Homilia laburra

Jesusean gauzatzen da Erreinua, **Berarengan, bere hitzetan, bere egintzetan**. Jainkoa Jesu Kristoren bidez mintzo zaigu eta Hirutasunaren barne-harremana guri ezagutarazten digu. Erreinuko bizitza da Jainkoaren bizitza, bihotz-berritzen eta bizitza berriz bizi duten gizakien historian presente egiten den Erreinuko bizitza.

Jesusen predikazioan egiten da presente Erreinua. Bere hitzak Jainkoaren nagusitza alboratu nahi duten indarren aurkako arao-otoitza (exorzismoa) dira. Jesusen hitzek itxaropen berria helarazten dute gizakien bihotzetara. Ebanjelioa, Jainkoaren gertutasunaren eta maitasunaren berri ona da. Jainkoak munduan justizia egin dezan itxaro duten nekatuen bihotzetan, sendatzen duen kontsolamendua dira Jesusen hitzak. Bekatariarentzat aukera berriaz mintzo da Jesus. Bizitza berregitea eta Jainkoarekin berriro adiskide izatea posible da.

Jesusen egintzetan egiten da presente Erreinua, egintza horiek adierazten baitute Jesusek dakarren eraldaketa bai gizaki bakoitzarentzat eta baita gizarte osoarentzat ere. Sendakuntzak Jainkoak gizakien zorionerako ari duen indarra adierazten dute. Jainkoa ez da bere interesen alde ari, seme-alabon onerako baizik.

Ikasleen elkartean egiten da presente Erreinua (Mt 4, 12-23). Erreinuaren etorrerak Jesusen bizitza aldatu zuen eta ikasleena ere bai, bizitza estilo berri bati hasiera eman baitzioten: odolaren lotura ez baizik eta Jesusen jarraibidea lokarri duen familia osatuz.

Elkarte hori Erreinuaren zerbitzura dago. Erreinoa gizakien artean presente nola egiten den adierazten duen parabola da elkarte hori, eta gizakiak askotan zatitzen dituen muga sozialak eta erlijiosoak haustera dator.

Kontzientzi azterketa

Hemen datorren galdera sorta ez da, besterik gabe, une honetan irakurtzeko pentsatua. Kontzientzi azterketa prestatu behar duenari laguntzeko prestatu dago; bakoitzak ikusiko du nola egokitu, zein alderdi apimarratu edota zein galdera kendu eta erantsi behar duen, elkarte bakoitzaren beharren arabera...

JAINKOAREKIKO NIRE HARREMANA

Jainkoa Aita dudala aitortzen al dut? Berarengan konfiantza ba al dut? Pozez eta itxaropenez bizi al naiz, Jainkoak maitatua eta salbatua sentituz? Jainkoa al da nire bihotzaren mina? Maite al dut gauza guztien gainetik? Jainkoaren maitasun hori senideak maitatuz bizi al dut? Zaintzen al dut nire espiritu-bizitza, fedean haziz eta heldutasuna iritsiz? Bilatzen al dut laguntzarik fede-bidean, edota bakardadean bizi dut nire kristau izatea? Ahalegintzen al naiz bizitza eta fedea uztartuz aurrera egiten? Konturatzen al naiz, Jainkoaren aurrean jarrita, bihotz-berritze beharra dudala? Arduratzen al naiz Adiskidetze sakramentua noizean behin ospatzeaz? Jainkoarekiko harremana zaintzen al dut eguneroko otoitz eginez? Berari eskeintzen al dizkiot nire lanak, nire pozak eta nire ezinak? Ba al dakit neure buruari barkatzen, Jainkoak barkatzen nauela jakinik? Irakurtzen al dut Jainkoaren Hitza, bereziki Ebanjelioa, nire bizitza beraren irizpideeen arabera antolatzeko? Parte hartzen al dut I Gandeko Eukaristian, Jaunaren egunean, nire kristau bizitzarako iturri eta eragile dela aitortuz? Konturatzen al naiz egiaz, elkartean bizi den fedea dela egiazko fede?

BESTEEDIKO NIRE HARREMANA

Nolakoa da besteekin dudan harremana? (etxekeekin, lagunekin, bizilagunekin, lankideekin, kristau elkarteko kideekin). Desberdintasunak izan arren, saiatzen al naiz denekiko maitasuna eta ulermena sendotzen, edota neure baitan itxita bizi naiz inolako elkarrizketarik bideratu gabe? Neure egiten al dut Jainkoak behartsuekiko duen lehentasuna? Zer arreta eskaintzen diet gaizki pasatzen dutenei? Justizia eta karitatea bizi al ditut? Besteen eskubideak errespetatu eta babesten al ditut? Saiatzen al naiz bihotz oneko izaten, harrera oneko, barkatzen bizkor eta laguntzeko prest beti? Eskandalagarri gertatzen natzaie besteei, edo neure jarrera onez aberasten ditut? Saiatzen al naiz Elizbarrutiak pastoral erronka berriei erantzuteko ari duen hausnarketan parte hartzen? Kristau elkartearen zerbitzura jartzen al ditut Jainkoak eman dizkidan dohainak, elkarteko zerbitzu eta ministeritza desberdinak bultzatuz?

NEURE BURUAREKIKO HARREMANA

Ba al dakit neure erruekiko kritikoa izaten edota besteekiko kritikan jarduten naiz beti? Neure burua ontzat daukat, farisearrek bezala, edota konturatzen naiz bihotz-berritze eta barkamen beharra dudala? Neurtzen al dut nire genioa, enbidia izateko joera edota kalte egite dituzten beste hainbat jokabide? Kristau eran bizi al ditut nire ardurak lanean, familian, gizarteko bizitzan, elkarteetan, atsedenean? Leiala al naiz ezkontzako, apaizgoko nahiz erlijioso bizitzako promesekin? Abendualdi honetan, zabaldu al diot bihotza Jainkoaren graziari, kristau bizitza itxaropenez eta pozez biziz? Maite al dut Maria Birjina, Ama eta bidelagun bezala?

Adiskidetzearen ohikunea

Senideok: aitortu zuen bekatuak eta egin otoitz elkarren alde, errukia iritsi ahal dezazuen.

*Guztiek esango dute: **Aitortzen diot...***

Senide maiteok, jar dezagun Jainkoarengan gure bihotz-berritzeko gogoak. Berak, Aita errukitsuak, garbi gaitzala gure leialtasun falta guztietatik, gure koherentzia faltatik.

*Erantzuna: **Zatoz, Jauna, gu salbatzera!***

- Gure fede ahulagatik: gure zalantza eta beldurrengatik, gure konpromiso eta testigantzagatik, gure fintasun falta eta gogorik ezagatik barkamena eskatzen dizugu.
- Gure itxaropen ahulagatik: gure tristura eta axolagabekeriagatik, gure presa eta pazientzia faltagatik, Jainkoaren Hitza ahazteagatik barkamena eskatzen dizugu.
- Gure maitasun epelagatik: besteen minarekiko ardura faltagatik, gure gastu neurrigabeengatik, gure indarkeria, haserre, gorroto eta ikusi ezinagatik barkamena eskatzen dizugu.
- Gure bekatu guztiengatik, gure gezur eta itxurakeriagatik, kontsumokeriagatik, gehiegi edukizteko gogoatik, neurri faltagatik barkamena eskatzen dizugu.

Kristok irakatsi bezala, eska diezaiozun Aitari etor dadila gugana egiaren, maitasunaren eta itxaropenaren berre Erreinua, Jainkoaren seme eta alaben familiakoak garela sumatuz: **Gure Aita...**

Banakako aitortza eta barkamena

Apaizengana gerturatuko dira orain bere bekatuak aitortu nahi dituztenak, banaka aitortza egin eta bekatuen barkamena hartzera. Bitartean kantu edota musika egokiak lagun dezake giroa sortzen.

Jainkoaren errukiarengatik eskerrak ematea

Aitortzak bukatuta, batzarburuak beste apaizak ere ondoan dituela, eskerrak emateko eta egintza egokiren bat egiteko deia luzatuko du. Penitentziaren graziaren adierazgarri izango da hori bai norberaren bizitzarako bai elkarteko bizitzarako ere.

Kantua: Bakea ta justizia (Gora Jainkoa 2, 7. orrialdea).

Otoitza

Egin dezagun otoitz.

Isilunea utzi.

Errukian aberatsa eta barkatzen eskuzabala zaren Jesu Kristo gure Jauna, giza haragiaren ahultasuna onartu zenuen, zure apaltasun ereduari jarraiturik zailtasunean gu sendotzeko: egizu zaindu ditzagula beti zugandik hartu ditugun dohainak eta penitentziaren bidez altxa gaitzezela bekatuak erorrarazten gaituenean zure amaigabeko errukia goratu ahal izateko. Errege bizi baitzara gizaldi eta gizaldietan. R/. Amen.

Bukaerako ohikunea

Jauna zuekin. R/. Eta zure espirituarekin.

Makur zaitetzte, Jainkoaren bedeinkapena hartzeko.

Jaunak zuzen ditzala zuen bihotzak Jainkoaren errukian eta Kristoren itxaropenean. Bizi berri bat goza dezazuela, gauza guztietan Jainkoarentzat atsegin izateko. R/. Amen.

Eta bedeinka zaitzatela Jainko ahalguztidunak, Aitak eta Semeak + eta Espiritu Santuak. R/. Amen.

Barkatuak daude zuen bekatuak. Zoazte Jaunaren bakean.
R/. Eskerrak Jainkoari.